

**LAPORAN PERHIMPUNAN ASOSAI KE 11 & SIMPOSIUM KE 4
DI ISLAMABAD, PAKISTAN
PADA 12 HINGGA 15 OKTOBER 2009**

Perhimpunan *Asian Organisation of Supreme Audit Institutions* (ASOSAI) ke 11 yang disertai oleh 140 orang delegasi dari 36 ahli anggota negara ASOSAI telah diadakan pada 12 hingga 15 Oktober 2009 di Islamabad, Pakistan. Perhimpunan ini bertujuan untuk memberi peluang kepada ahli anggota ASOSAI bertukar pandangan dan pengalaman mengenai isu dan perkembangan bidang pengauditan sektor awam di samping mengeratkan hubungan antara mereka.

Dalam mesej Perdana Menteri Pakistan sempena perasmian perhimpunan ini, beliau menyebut tentang pentingnya peranan Institusi Utama Audit dalam memastikan wang awam dibelanja dengan berhemat. Menurut beliau adalah perlu juruaudit dilengkapi dengan kemahiran professional agar mereka boleh melaksanakan tugas pengauditan dengan efektif. Oleh yang demikian, kerjasama antara Institusi Utama Audit akan dapat membantu meningkatkan kapasiti tersebut. Presiden Pakistan pula dalam mesej beliau menekankan bahawa pengauditan merupakan instrumen pengawasan kewangan yang kritikal bagi memastikan ketelusan dan akauntabiliti dalam penggunaan wang awam. Beliau percaya melalui perhimpunan ini, ahli anggota ASOSAI akan berkongsi pengalaman dan kebijaksanaan bagi membolehkan mereka bertindakbalas terhadap sebarang cabaran tadbir urus yang baik.



Bersama Ketua-ketua Delegasi Perhimpunan

Perhimpunan ASOSAI ini terbahagi kepada dua sesi plenari. Pada sesi pertama plenari yang berlangsung pada 12 Oktober 2009, Perhimpunan telah bersetuju menerima laporan aktiviti dari Setiausaha Agung, pembentangan Penyata Kewangan bagi tahun kewangan 2006 – 2008, laporan Jawatankuasa Audit, pembentangan Pelan Strategik serta aktiviti latihan ASOSAI dan INTOSAI Development Initiative (IDI). Di samping itu, cadangan untuk meminta Piagam ASOSAI yang disyorkan oleh Jawatankuasa Khas dan laporan – laporan mengenai projek penyelidikan ke 8, jurnal dan laman rasmi ASOSAI, Jawatankuasa Kewangan dan Pentadbiran INTOSAI dan Jawatankuasa Perkongsian Pengetahuan INTOSAI juga dipersetujui.



Sesi Plenari Pertama

Pada Perhimpunan ini, ahli anggota ASOSAI telah dimaklumkan mengenai pencalonan negara – negara bagi jawatan ahli Lembaga Pengelola ASOSAI dan Jawatankuasa Audit serta penerangan mengenai prosedur pengundian. Setiausaha Agung ASOSAI juga telah mengistiharkan beberapa jawatan/hos baru seperti berikut:

- Pengerusi Perhimpunan - Institusi Utama Audit Pakistan
- Hos Perhimpunan 2012 - Institusi Utama Audit India
- Setiausaha Agung - Institusi Utama Audit Korea Selatan
- Ahli ASOSAI yang dilantik bagi Lembaga Pengelola INTOSAI - Institusi Utama Audit Pakistan.

Turut diadakan bersempena perhimpunan ini ialah Simposium ASOSAI ke 4 dengan tajuk *The Role of SAIs in Enhancing Effectiveness of Public Expenditure* yang berlangsung pada 14 Oktober 2009. Y. Bhg. Tan Sri Dato' Setia Ambrin bin Buang, Ketua Audit Negara Malaysia adalah antara panel yang menyertai pembentangan dan perbincangan topik ini selain dari negara Bhutan, Pakistan dan Russia. Dalam pembentangan Ketua Audit Negara, beliau memfokuskan kepada Indeks Akauntabiliti bagi meningkatkan keberkesanan perbelanjaan awam. Inisiatif ini telah menarik minat Pengerusi panel iaitu Encik Tanwir Ali Agha yang menyifatkan ia sebagai satu inisiatif yang amat inovatif. Indeks Akauntabiliti juga mendapat perhatian para delegasi semasa perbincangan terbuka terutama mengenai penerimaan Indeks Akauntabiliti oleh Kerajaan dan impak Indeks Akauntabiliti terhadap operasi auditi.



Pembentangan Kertas Negara oleh Ketua Audit Negara

Pada 15 Oktober 2009, para delegasi pada sesi kedua Plenari ini bersetuju menerima laporan pengerusi mengenai Simposium ASOSAI ke 4, pembentangan bajet ASOSAI 2009 oleh Setiausaha Agung dan laporan terhadap Jawatankuasa Kerja Pengauditan Alam Sekitar oleh Institusi Utama Audit China. Perhimpunan juga telah dimaklumkan mengenai komposisi ahli Lembaga Pengelola ASOSAI bagi tahun 2010 – 2012 yang terdiri daripada negara Kuwait, Indonesia, Bangladesh, Turkey, Vietnam dan Iraq. Manakala Jawatankuasa Audit yang dipilih ialah Institusi Utama Audit Saudi Arabia dan Mongolia.

Sesi ini juga menyaksikan ucapan daripada Ketua Audit Negara India sebagai hos Perhimpunan ASOSAI 2012 dan Ketua Audit Negara Korea Selatan sebagai Setiausaha Agung ASOSAI 2010 – 2012. Ucapan penutup Perhimpunan daripada pengerusi ASOSAI iaitu Ketua Audit Negara Pakistan mengakhiri sesi ini.



Delegasi Perhimpunan ASOSAI ke-11